



Universitätsbibliothek Paderborn

**Conversio Peccatoris, Seu Modus quo Peccator
communiter resurgit ad justitiam.**

Lefelon, Antoine

Bruxellis, 1675

§. 9. Quomodo intelligendum, quòd melius sit excedere in misericordia,
quàm in rigore.

urn:nbn:de:hbz:466:1-9433

§. IX.

Quomodo intelligendum, quod melius sit excēdere in misericordia, quam in rigore.

Quod itaque Auctor subjungit: *deinde et si erramus modicam pænitentiam imponentes: nonne melius est propter misericordiam rationem dare, quam propter crudelitatem?* Modicam pænitentiam intelligo, quā severior illius temporis rigor non nihil remittetur, & illi vehementissimæ molestiæ humilationis cordis, contritionis spiritus, & tribulationis pænitentiæ, sine qua tunc mortalia peccata non relaxari solita ex Augustino cognovimus, aliquid detraheretur; cuiusmodi modica pænitentia hodie grandis foret, & maxima, ut proinde levissimæ illæ de quibus nunc agitur, pænitentiæ, his ejus verbis censi nequeant confirmari.

Insuper melius est propter misericordiam rationem dare, quam propter crudelitatem, nempè nisi illa quæ dicitur misericordia plus sæviat quam crudelitas: ut enim segnes natos facit indulgentia matrum, ita tepidus fit pænitens, cui nimium parcitur, & plurimi à peccandi consuetudine sese vel conservassent, vel

emendassent, nisi illâ, quam dicunt, benignâ misericordiâ, eis semper fuisset indulatum. Confessariis Patris nomen à pænitente tribuitur; propter quod ut Patres sese ei exhibeant; sed noverint dictum:
Qui parcit virga odit filium suum, qui autem diligit illum instanter erudit. Certè plus arguitur medici misericordia dum vulnera, quæ manu parcente contractat, non curat, sed exaggerat, quâm ejus immitis severitas, quæ dum non parcit, sanat.

Subjungit denique: *Vbi enim Paterfamilias largus est, dispensator non debet esse tenax: si Deus benignus est, ut quid Sacerdos ejus austerus? Vis apparere sanctus? circa vitam tuam esto austerus, circa alienam benignus.* Paterfamilias largus est, quia non solum peccata donat, & debitam illis æternam pænam per mortem filii sui misericorditer remittit, sed & temporali, quæ ejus exigente justitiâ persolvi debet, pænâ nondum completâ pænitentem in gratiam suscipit: permittit quoque non omnem rigorem à Confessario erga pænitentem servari; ac per hoc dispensator non debet esse tenax, ut hujus infirmitati nihil velit condescendere; sic tamen Deus benignus est, ut simul sit justus, & sicut ex ejus miseri-

misericordia est quod hic possit nonnihil pænitenti condescendi , ita justitia exigit ut non ex toto pæna relaxetur. Propter quod immisericors non est Sacerdotis austeritas , dum utrumque attendit ; misericordiam, ut pænitentium imbecillitati noverit compati ; justitiam , ut præteritas offensas ab ipsis voluntariâ satagat castigatione puniri , præsertim quantum & cavendi relapsus exigit cautio , & ratio sanandæ eorum infirmitatis.

Hæc duo justitia & misericordia, omnibus quidem Rectoribus , speciatim tamen necessariæ sunt Confessariis : *Quia Comm. in 1. primum sine secundo , ait S. Thomas , est severitas , secundum sine primo est remissio.* Et ante ipsum Gregorius : *Disciplina , inquit , vel misericordia multum destituitur , si una sine altera teneatur : sed circa subditos suos , inesse Rectoribus debet , & justè consolans misericordiâ , & piè seviens disciplinâ. Hinc est quod semivivi illius vulneribus , qui à Samaritano in stabulum ductus est , & vinum adhibetur , & oleum : ut per vinum mordeantur vulnera , per oleum soveantur : quatenus unusquisque qui sanandis vulneribus præst , in vino morsum distinctionis adhibeat , in oleo mollitiem pietatis ; per vinum mundentur putrida , per oleum sananda soveantur : miscenda est ergo lenitas cum se-*

262 C O N V E R S I O

veritate , faciendumquè quoddam ex utraque
temperamentum : ut neque multā asperitate ex-
ulcerentur subditi , neque nimia benignitate
solvantur.

Ad majorem Dei gloriam.



INDEX